

## Les foires de D'lémont âtrefois

I veus épeurvaie d'raissembyaie mes seûv'nis po vos déch'crire les foires de D'lémont dains l'temps. Oh, è n'y é p' che grant, mains c'était tot d'meinme en lai moitie di siecle péssè, dains les années cinqante. Mitnaint, è y en é ainco cïntche pai an, mains les dgens n' se dépiaïçant pus.

Ces foires étint brâmant ïmpoëtchainnes, po tot l' Jura. È yi v'niait des mairtchainds dâs bïn loin. Elles aivïnt yûe le trâjieme mairdè di mois. Dïnche, è y en aivait doze. I peus vos aichurie qu'è y aivait brâmant d' monde dains lai Grand'Rue è D'lémont, qu'an aippeule mitnaint lai Vie di vinte-troès djuïn, et aijbïn dains les véjènnes vies.

L'ambiaince était définmeu, les dgens se r'trovïnt et aivïnt aidè âtche è s'racontaie, é étchaindgie. I v'niôs, aivô mai mère, dâs Cortchaipoix, en pochte. Po moi, c'était ïn djo d' féte. I aivôs heûte, nûef ans les permies côps. I crais bïn qu'i aivôs ènne pionâtique malaidie po n' pe allaie en l'école ci djo-li. I m'seus bïn raittraipaie pai lai cheûte, vos l'saites bïn.

Chu lai Piaice de l'Etaing, è y aivait l' mairtchie ès poûes. Tot ci yûe était r'tieuvi de caisses ès poûes. È y en aivait pus de cent, pieinnes de p'têts poûes, de gorêts. Les païyisains de tos les v'laidges di Vâ en aimoënïnt et c'était chutot, c'ment è m'en s'vïnt, des mairtchainds de l'almouesse Suisse que les aitchtïnt po les engrachi. È y aivait bïn chur les sentous, mains aijbïn les breuyats de ces gorêts di temps qu'an les pregnait pai les paittes de drie po les botiae dains ènne âtre caisse. I vois ainco l'creuchia môment d'lai vente, aivô ènne foûeche poingnie d' mains ou bïn doues mains qu'se tapïnt c'ment faint les chportifs.

En pus d' çoli, è y aivait l'mairtchie ès tchvâs, de lai sen des prijons. Lai piaice potche ainco l'nom : « Mairtchie ès Tchvâs. » Tot près de li, an trovait aijbïn le mairtchie des grosses bêtes : des vaitches, des dgeneusses. D'ènne âtre sen, an poyait aitchtaie des lapïns, des tchaits, des tchiins, des dgerennes et meinme des pouses-de-mèe.

Ènne piaice était bïn chur réservée po les aigrecôles maichines et les tirous. Po nos, les afaints, lai foire était ïn pô c'ment ïn p'tét zoo, aivô tot piein de tieulées, de bru, de tapaidge et de va-et-vïnt.

Ènne fidiure qu'me r'vïnt en mémouere adjd'heû, c'était le « Toporan ». Vos comprentes tus bïn ço qu' çoli veut dire : tot-po-ran ! Èl aivait son bainc de foire d'veint l'aipotiqu'rie Montavon qu'ât mitnaint l'aipotiqu'rie di Tyia,

djeutement è l'entrée de RFJ. C'était ïn hanne qu'aivait aidè l' sôrire et qu'les dgens ainmiñt bïn. È vendait totes soûetches de djotats. Po s'bïn faire è r'mairtchaie, èl aivait ïn p'tét chiôtrat dains lai boûetche, que niun d'âtre que lu n'airait poyu meu faire alliae. C'était ïn piaiji de l'ôyi. Vos peutes bïn musaie qu'dinche, not' Toporan f'sait ènne boènne djoènnèe en lai foire de D'lémont.

Les âtres mairtchainds f'sint aijbïn de boènnes aiffaires, taint è y aivait di monde. An trovait des valmonts d'haîyons, des sulaies, des tchaipés, des chlèqu'ries de totes soûetches, i n' sérôs tot énnïnm'raie ci, et çoli tchaindgeait ch'lon les séjons.

Ïn âtre personnaidge, qu'aivait son long bainc de foire d'veint lai mâjon d'velle, me r'vïnt en mémouere. Chu ènne môtrouse, an poyait yére : « Zum Billigen Jakob ». Èl aivait tot ço qu'è fât po les paiyisains, meinme des bretèlles ! I crais bïn qu' ci Jakob ne saivait piep' ïn mot d' frainçais, mains lu âchi f'sait ènne boènne djoènnèe.

Et peus, è médè, tiaind les échtomaics gairgouyïnt, è fayait r'pâre des foûeches. Dâli, tos les cabarets étint pieins. I me s'vïns qu'aivô mes pairents, nos allïns s'vent à M'lïn, poche que lai patronne v'niait de Cortchaipoix. Les dgens aivïnt le tchoix entre le Bûe, l'Echpaigne, lai Biantche Croûx, lai Coranne, le Bianc Tchvâ, le Soraye, le Lion d'Oûe èt peus l' Central, qu'è ïn âtre nom mitnaint. I y'en aî chur'ment rébiè pus d'yun. Dains tos ces rechtaurants, è y aivait ènne boènne ambiaince.

Aiprèz lai nonne, des uns s'botïnt è djuere és câtches, d'âtres rallïnt ch' lai foire po ainco aitchtaie âtche. À moitan d'lai vâprèe, an poyait dainsie dains quelques cabarets, chutot en lai foire de Saint-Maitchin. È y en aivait tot piein que n' rentrïnt p' le meinme djo. I vos léche musaie és malaijies r'tos en l'hôtâ po ces qu'aivïnt ïn pô trop fêtè...

An m'ont raicontè qu'ïn paiyisain d'lai Tiere Sainte v'niait s'vent è D'lémont aivô ïn tché tirie pai douz tchvâs, poche qu'èl était mairtchaind d'bôs. Bïn chur, è v'niait aijbïn en lai foire. Dâli, en rentraint dains l'Vâ Tèrbi, bïn s'vent è s'endremait. Ses tchvâs cognéchïnt bïn l' paircouè et ès étint aivégis è s'airrâtaie è R'colainne, à cabaret de l'Helvetia. Li, è y aivait ïn p'tét tchairi aivô ïn pô d' foin èt peus de l'âve. Dâli, ces tchvâs allïnt dôs ci tchairi et c'ment è n'y aivait pus d' bru, not' paiyisain s'revoyaït. C'ment èl aivait ïn pô soi, èl allait boire ïn tchâvé à cabaret d'veint de rentraie en l'hôtâ. I vos aichure que c'ât lai voirtè.

An peut aivoi lai grie de ces môments-li, mains c'ât dinche, aivô l'temps, tot piein de tchôses aint tchaindgie.